

दिनांक 22.03.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- भारत रो **सकल घरेलू उत्पाद – जीडीपी** लारला 10 साल मांय दूणो व्ह्यो— चार लाख तीस हजार करोड़ डॉलर रा लेवल ताई पूग्यो ।
- जल शक्ति मंत्री सी.आर. पाटिल पाणी बचावण रा अभियान **कैच द रेन-2025** री सरुआत कीनी ।
- अर्थ आवर डे रे मौके आज रात साढे आठ ऊं साढे नौ बज्यां ताई दुनियाभर मांय गैर ज़रूरी लाइटां बंद कर र बिजली अर पर्यावरण ने बचावण रो संदेश दियो जावेला ।
- उपमुख्यमंत्री दिया कुमारी जयपुर मांय जूनी कारां री प्रदर्शनी रो उद्घाटन कीनो—शहर मांय काल आं कारां री रैली निकाळी जावेला ।

000

भारत रो **सकल घरेलू उत्पाद-जीडीपी** लारला 10 साल मांय 105 फीसदी री बधोतरी सागे दूणा ऊं बत्तो व्हे ग्यो है । साल 2015 मांय जीडीपी दो लाख दस हजार करोड़ डॉलर ही जो साल 2025 मांय चार लाख तीस हजार करोड़ डॉलर रा लेवल ताई पूग ग्यी । **अंतर्राष्ट्रीय मुद्रा कोष-आईएमएफ** री ओर ऊं जारी आंकड़ां रे मुजब अमरीका, चीन, जर्मनी अर जापान पाछे भारत जीडीपी रा मामला मांय दुनिया री पांचवीं माली ताकत बण ग्यो है ।

000

जल शक्ति मंत्रालय अर पर्यावरण, वन अर जलवायु परिवर्तन मंत्रालय री ओर ऊं आज देश मांय जल शक्ति अभियान: **कैच द रेन-2025** री सरुआत करी ज्यी । जल शक्ति मंत्री सी.आर. पाटिल हरियाणा रा पंचकुला ऊं ई अभियान री सरुआत कीनी । अभियान रा तैत आब-ओ-हवा मांय बदलाव अर पाणी रा हलका ऊं जुड़ी चुनौतियां ने ध्यान राखता थकां पाणी बचावण, बिरखा रो पाणी बचावण अर ज़मीं हेटे पाणी रा लेवल ने ओजू ऊंचो लावण माथे खास ध्यान दियो जा रह्यो है । ई मौके श्री पाटिल कह्यो के जल जीवन मिशन रे मार्फत मोटी तादाद मांय लोगां ने पीवण रो साफ पाणी मुहैया करायो जा रह्यो है ।

.....

जल शक्ति मंत्री आज विश्व जल दिवस रे मौके **जल-जंगल-जन: एक प्राकृतिक बंधन** अभियान री ई सरुआत कीनी । ई अभियान रे जरिये नदियां, झरना अर जंगलां बीचे रिश्ता मज़बूत बनाया जावेला । प्रधानमंत्री नरेन्द्र मोदी विश्व जल दिवस रे मौके पाणी बचावण अर सगळां रा विकास ने बधावो देवण री बात ओजू कही ।

.....

मुख्यमंत्री भजनलाल शर्मा जनता ऊं पाणी ने बचावण ने आदत बणावण री अपील कीनी है । सोशल मीडिया पोस्ट रे जरिये श्री शर्मा पाणी गंदो व्हेवण ऊं बचावण अर बिरखा रो पाणी भेळो करण बाबत् सगळां ने मिल र सार्थक कदम उठावण सारू कह्यो । विश्व जल दिवस रे मौके प्रदेश मांय ई न्यारी-न्यारी ठोड़ां जागरूकता कार्यक्रम राख्यी ज्यी । बाड़मेर जिला रा आगोर री सरकारी स्कूल मांय संगोष्ठी अर न्यारी-न्यारी होड़ां राख्यी ज्यी ।

पाली ज़िला रा साण्डेराव मांय ई पाणी बचावण रो अभियान चलायी ज्यो। बारां ज़िला री शाहबाद पंचायत समिति मांय ब्लॉक स्तर परां राख्यी ज्यी जन सहभागिता कार्यशाला मांय पाणी बचावण री शपथ दिराई ज्यी। झुंझुनूं, बाड़मेर, जैसलमेर अर जालौर ऊं ई खास कार्यक्रम राख्या जावण रा समाचार मिल्या है।

000

मुख्यमंत्री भजनलाल शर्मा कह्यो है के त्यौहारां मांय भारत री संस्कृति री झलक मिले है। वे आज जयपुर मांय राख्यी ज्यो होली मिलन समारोह मांय बोल रह्या हा। ई मौके वे भारतीय जनता पार्टी रा कार्यकर्तावां ऊं देश री सेवा अर संकल्प सागे काम करण बाबत् कह्यो।

.....

जळसा मांय केन्द्रीय संस्कृति अर पर्यटन मंत्री गजेन्द्र सिंह शेखावत अर प्रदेश भाजपा अध्यक्ष मदन राठौड़ समेत केई सांसद, विधायक, महापौर अर मोटी तादाद मांय भाजपा रा कार्यकर्ता शिरकत कीनी।

000

.....

000

“अर्थ ऑवर डे” रे मौके आज रात साढे आठ ऊं साढे नौ बज्यां ताई दुनियाभर मांय गैर—जरूरी बिजली बंद राख र बिजली बचावण रो संदेश दियो जावेला। “अर्थ ऑवर डे” रो ई साल रो मुद्दो है — “द पॉवर ऑफ नेचर”। भारत समेत केई देशां री ऐतिहासिक इमारतां ई पहल मांय शामिल व्हेला। राज्यपाल हरिभाऊ बागडे जनता ऊं “अर्थ ऑवर डे” मांय भागीदारी री अपील कीनी है। ई मौके राजभवन मांय ई एक घंटा सारू बिजली बंद राख्यी जावेला। ध्यानजोग है के बिजली बचावण रा मकसद ऊं पूरी दुनिया मांय ‘अर्थ ऑवर डे’ मनायो जावे है।

000

भारतीय कौशल विकास विश्वविद्यालय रो दूजो दीक्षांत समारोह आज जयपुर मांय राख्यी ज्यो। कार्यक्रम मांय उपमुख्यमंत्री डॉ. प्रेमचन्द बैरवा तीन सौ विद्यार्थियां ने उपाधियां दीनी। ई मौके डॉ. बैरवा कह्यो के कौशल विकास ऊं नौकरी—धंधा रा नुवा मौका बणे है। वे कह्यो के सरकार कौशल विकास सारू न्यारा—न्यारा व्यावसायिक कोर्स माथे खास ध्यान दे रही है।

000

जनस्वास्थ्य अभियांत्रिकी मंत्री कन्हैयालाल चौधरी टीबी रा मरीजां री पिछाण कर र वां रा ईलाज मांय मदद करण री अपील कीनी है। वे आज टोंक मांय विश्व क्षय रोग दिवस रा सिलसिला मांय राख्यी ज्यो कार्यक्रम मांय बोल रह्या हा। श्री चौधरी लोगां ऊं निःक्षय मित्र बण र टीबी रा ईलाज मांय मदद करण बाबत् कह्यो। वे कह्यो के टी.बी. री बीमारी ने जड़ ऊं खत्म करण सारू सगळां री भागीदारी जरूरी है। ई मौके वे टोंक ज़िला री टीबी मुक्त 16 ग्राम पंचायतां रा प्रशासकां अर कर्मचारियां रो मान कीनो।

000

जयपुर मांय आज विंटेज अर क्लासिक कार प्रदर्शनी सरू व्ही। इण मांय एक सौ ऊं बत्ती जूनी अर क्लासिक कारां रो दरसाव करी ज्यो है। उपमुख्यमंत्री दिया कुमारी ई प्रदर्शनी रो उद्घाटन कीनो। खबरनवीसा सागे बातचीत करता थकां दिया कुमारी कह्यो के कार प्रेमियां सारू ओ खास अनुभव है अर इण ऊं सैर—सपाटा ने ई बधावो मिलेला। काल आं कारां री रैली निकाळी जावेला।

000

उदयपुर मांय चाल रह्या 10 दिन रा राष्ट्रीय दिव्य कला मेळा मांय मोटी तादाद मांय लोग पूग रह्या है। मेळा मांय देश रा न्यारा—न्यारा राज्यां अर केन्द्र रा राज वाळा प्रदेशां रा दिव्यांग कारोबारी अर कलाकार शिरकत कर रह्या है। म्हाणा खबरनवीस बतायो के सामाजिक न्याय अर अधिकारिकता विभाग री ओर ऊं लगाया जा रह्या ई मेळा मांय दिव्यांगजन री ओर ऊं न्यारा—न्यारा राज्यां रा खाण—पीण री चीजां री दुकानां लगायी ज्यी है।

000

कोटपूतली मांय आज 64 टाबरियां ने मुफ्त स्कूटी दीरीजी। राजकीय एल.बी.एस. पी.जी. कॉलेज मांय राख्यी ज्या जळसा मांय देवनारायण अर कालीबाई भील मेधावी छात्रा स्कूटी वितरण योजना रा तैत दीरीजी स्कूटी मिलण ऊं छात्रावां अर वां रा पिरवारा वाळा घणा राजी व्ह्या।

000

जयपुर मांय पुलिस गैर-कानूनी हथियारां सागे चार बदमाशां ने गिरफ्तार कीना है। पुलिस उपायुक्त राशि डोगरा खबरनीवां सागे बातचीत रे दौरान आ जाणकारी दीनी। वे बतायो के अ बदमाश विरोधी गैंग रा लोगां री हित्या करण रा मकसद ऊं हथियार भेळा कर रह्या हा। बदमाशां ऊं पूछताछ करी जा रही है। ई बीच पुलिस जालौर जिला रा पुनासा मांय गैर-कानूनी तरीका ऊं हासिल करीजी सम्पत्ति ने सीज़ कर दीनी। एस.पी. ज्ञानचंद यादव बतायो के आ सम्पत्ति नशीली चीजां अर शराब री तस्करी रे जरिये हासिल करण री शंका है।

000

प्रदेश मांय 25 मार्च ऊं पारो चढ़बा रा आसार है। मौसम विभाग रे मुजब राज्य मांय पछुआ हवा रा असर ऊं तापमान मांय तीन डिग्री सेल्सियस ताई री बधोतरी री संभावना है। लारला चौबीस घंटां मांय बाड़मेर मांय पारो 37 दशमलव 6 डिग्री सेल्सियस ताई पूग ग्यो। चित्तौड़गढ़, धौलपुर, जैसलमेर, जोधपुर अर फ्लौदी मांय ई दिन री बगत तापमान 35 डिग्री सेल्सियस ऊं ऊंचो दर्ज करी ज्यो। दूजी कानी बीकानेर, श्रीगंगानगर, हनुमानगढ़ अर चूरू मांय सिंज्यां री पोर हल्को सीळो बायरो बाज्यो। राजधानी जयपुर, सीकर अर दौसा मांय ई हल्की ठण्डक रही।

000